

四庫全書

史部

欽定四庫全書

平定兩金川方畧卷一百十五

三月癸丑舒常奏言科拉木達碉寨已被礮摧塌
大半惟喀爾西在科拉木達之上碉卡甚多尚未
十分傾頽然賊人俱匿地窖不敢露身若猝然攻
得科拉木達隨即攻取喀爾西諒易得手即於本
月二十日臣等派阿蘭保阿滿泰進財保等帶兵
分路前進賊即知覺放鎗拋石我兵既係仰攻又

兼一線細路紆迴而上不能迅速畢登然皆不避鎗石奮勇上撲直至科拉木達之下拔開鹿角拋擲火彈賊仍捨死拒守其喀爾西之北阿蘭保帶兵進攻牽綴賊人不暇下壓而其西首山頂以及沿河一帶賊衆紛集救援從西南向下衝壓我兵一面攻打一面分兵迎殺來援之賊被鎗箭斃者十餘人餘俱竄入密林賊人隨於鎗箭不及處繞至科拉木達之上悉力死守未能即克因令官兵

徐徐撤回又據提督馬彪等報稱本月十七日宜喜山梁有賊一百數十人分為兩起潛來劫竊營盤我兵放鎗迎擊斃賊四名追至溝底忽有埋伏賊番數十名從林內突出隨即截殺又斃賊數名受傷拖回者十餘名臣等將奮勇弁兵記名酌加獎賞至近日投出金川番衆其男人有可隨征出力者即留營差遣現在投出番人男婦五名口係投番阿咱拉親戚是以將男番留營隨征奏入

上諭軍機大臣曰明亮等進攻喀爾西科拉木達一招雖亦殲賊十餘究未得有寸進看來此一帶進攻徒勞無益不如徑赴宜喜為是通計所調之兵及帶石挑用數千合之宜喜原有之兵可得萬餘兵數已為不少就圖中形勢而論若從達爾圖山梁下壓可得斯達愛卡寨並可旁攻特朗賊碉即至噶爾丹寺對河與阿桂夾攻似覺直捷其帶石一路仍留舒常在彼並於奎林和隆武三寶三人內酌派一人同駐防

守牽綴賊勢至於宜喜進兵雖亦可備出奇制勝但
究如治病偏方不能專恃其實在可望進攻得手仍
仗阿桂一路所有現調之陝甘貴州官兵據各該督
撫奏稱均係棟派精銳可用者令其遠程赴川此六
千新兵諭令全數前往阿桂軍營應用阿桂接奉前
旨自應飛飭各省帶兵之員遵照迅往營中添此六
千新銳之兵即可多添一兩路進攻自更易於集事
但阿桂現在仍須隨時設法進取不可俟新兵到齊再

辨又據明亮奏稱投出金川番衆有可隨征出力者
即留營差遣等語所辨甚謬此等賊番狡詐叵測留
之營中實無益而有損若欲藉其留營號召番衆更
可不必昨歲賊番勢整或須設法以潰散其心今既
紛紛投出何藉復為號召即或觀望不來我兵攻破
賊巢之後無難悉行擒戮更無庸預為招致如以此
輩悔罪來投姑貸其死亦止應交綽斯甲布等土司
處安插不宜留在營中况阿桂富德兩路來投之番

俱經盤獲奸細惟明亮一路獨無安知現在所留番
人不即有奸細在內萬一勾連滋事所關非小現在
功屆垂成尤當詳慎此皆明亮舒常未曾閱歷所致
朕深為懸念况據富德處盤獲奸番僧格等供土司
派人分往西路北路探聽事情曾諭令明亮等留心
體察切勿為其所惑悞墮賊人術中著諭明亮等將
所有留營降番除霍爾甲阿咱拉二人外餘悉分派
各土司安插勿令存留貽患如有續行投降形跡稍

可疑者即當嚴加刑訊務得確情毋使賊番逞其鬼
蜮伎倆至各路軍營或亦有似明亮處將降番留營
隨征者並著分遣各土司處妥為安插

臣等謹按行師機要竒正互用明亮於科拉木
達碯寨仰攻未得蒙

皇上訓示不如徑赴宜喜為出竒制勝之策并

諭以從達爾圖山梁下壓可至噶爾丹寺與臣阿桂對
河夾攻萬里情形瞭如聚米索綯不差而於降

番留營一事再三

申誠惟恐偶墮術中所以諸臣恪遵

睿謨往輒有功不致踈虞於萬一也

庚申阿桂豐昇額色布騰巴爾珠爾海蘭察額森
特奏言臣等前於沿河羣尼等處令官兵連擊木
柵三十餘座相近羣尼寨下並設礮臺三座移往
各種礮位竭力攢轟礮寨亦漸坍塌臣等因令副
都統瑚尼爾圖等侍衛彰靄等帶兵從左手循田礮

進攻又派領隊大臣福康安副都統額爾特佛倫
泰侍衛秦斐英阿等從右手進攻又派遊擊靈山
等沿河進攻其總兵官達色侍衛那木札等攻打
向南來珠寨落以牽賊勢臣豐昇額親往督率臣
海蘭察額森特同總兵海祿侍衛格勒爾德等緊
隨策應當於二十五日卯刻進攻該處本係莊稼
之地易於剗挖是以賊人所掘壕溝較前更為深
濶官兵正在設法過壕而賊人業經知覺乘墉抗

拒鎗石如雨官兵鎗箭齊發將露處之賊擊斃賊
又即於壕沿挖成鎗眼潛伏放鎗三隊官兵正擬
相機撲進維時來珠寨之賊聚集最多雖被官兵
綴掣而得式梯等處之賊見勢危急遂悉從寨後
前來捨死策應官兵上前迎擊殲賊不少賊隨敗
竄而河西之賊又用船過河同沿河各卡之賊合
力前來接應雖經官兵分頭擊退而峒內及壕溝
之賊擲石放鎗愈加緊密久站多傷因將各兵酌

撤查賊因官兵一抵得式梯寨一面攻圍一面即可前進故於此守禦幾於無隙可乘但相度形勢因右手田礮之上有大戰礮一座過我兵進攻賊即乘高放鎗撓我進攻之力必將此礮用礮轟毀則羣尼各寨始易克取此三四日又督令官兵於右手進擊木柵五座相距大礮更近移礮晝夜轟擊俟其頽墮突然攻撲賊人應援不及必能得手至木思工噶克山梁各處礮卡木城互為聯絡惟

向西迤下三處有拉爾甲一處碉卡稍稀若出其
不意直前攻奪則可截佔木思工噶克得式梯中
間並可進取噶爾丹寺等處

同日阿桂豐昇額色布騰巴爾珠爾又奏言據富
德咨稱現已於馬奈吉地等處派出兵二千七百
五十名計三月初一二等日可以全抵宜喜查宜
喜添此南路之兵原可即行攻打但達爾圖山腿
綿長如兵力不敷未能一面繞截賊人之後一面

乘其慌亂佔佳險窄山梁直下河沿臣等與明亮
札商即令挑撥之兵竟至相近日旁處所暫為存
駐即或賊人望見亦不過謂日旁一帶增添兵力
諒不疑又從宜喜合攻俟新調川兵一至突然往
攻自能得力其新調川兵據文綬咨稱督提城守
各標營兵二百名已於二月二十一日自省起程
其餘亦續至桃關前進並准富勒渾咨稱於後路防
守將領內派出副將烏林太都司武彰阿等馳赴

雜谷腦此項兵丁到時即行帶領前往約計本月
二十日以前均可前抵日旁臣阿桂以籌辦衝壓
攻截及兩路合力夾擊之處恐非筆墨所能盡者
而日旁大營與臣等駐劄之地本可朝發夕至因
令明亮即日來營面籌一切不過一兩日仍即速
回日旁趕緊辦理至臣阿桂議請調陝甘貴州三
省補缺等兵共六千名原非必欲添於西路惟恐
將來大兵即從宜喜壓下攻破勒烏圍賊巢而賊

人尚冀稍延殘喘為退守噶拉依之計則於功噶爾拉等處另添一路官兵賊必萬不能支更可期速即
歲事

同日明亮舒常奏言南路抽撥三千七百名頭二起於前月二十五六等日已抵木池即令在了谷後面隱密山坳處暫為屯駐其餘約俟三月初五前後均可到齊但自川省調出之三千兵必於初十前後始能畢集臣等俟各兵到齊佈置周備一

舉自可成功現在日旁全軍尚未移動仍令在喀爾西科拉木達等處隨時相機迎擊如能奪取一二地方亦足以牽綴賊勢至宜喜一帶山形地勢臣等久經深悉而近日賊人拒守情形雖沿山上下各碉不見少懈其在內作何光景正須密為偵探現據遣往屯土各兵回稱跣看山下各寨落內僅有婦女幼弱在彼看守若能統兵直下更無阻隔等語臣等思前此限於兵數不敷必須逐層進

步難於下壓今抽派各項官兵不下萬人足敷應用惟當一面繞攻接連達爾圖之特朗一帶礮卡一面連營列柵而前聲勢得以聯絡自無不破之理但去路甚多其中曲折相通何處可以爭竒扼要何處可以避實擊虛臣等現與奎林和隆武三寶三人以及領隊大臣再四熟商即將分路進兵事宜繪圖貼說質之阿桂務使無稍疎漏始可勢如破竹均奏入

上諭軍機大臣曰阿桂等奏攻打沿河碉寨並現在籌辦相機深入情形所籌甚好又覆奏所以請調陝甘貴州三省官兵之故惟恐將來大兵攻破勒烏圍賊人尚為退守噶拉依之計則於功噶爾拉等處另添一路兵丁可期速即藏事等語此計殊可不必前已屢次傳諭阿桂令將新調之六千兵槩行調赴西路軍營分派合勒阿桂處添此兵力自更有益若功噶爾拉等處山險路長雖派五六千兵前往亦恐未必得濟即官

兵攻破勒烏圍之後賊果退守噶拉依阿桂亦惟當
與明亮通計所有兵衆設法分路攻勦或派兵於馬
爾邦一帶夾攻引進富德并力勦擊噶拉依或派豐
昇額徑赴卡撒一路共籌合勦均屬直捷穩安且俱
易於照料何必自外繞赴功噶爾拉轉置新兵於無可把
握之地乎阿桂自當斟酌妥辦勿再拘泥前說又據
稱令南路挑撥之兵於相近日旁處所暫為存駐俟
新調川兵全至突然統領進攻并稱札致明亮即日

來營面籌一切等語籌畫可謂盡心明亮亦奏及此事自應如此辦理至川兵於三月初旬可以全赴宜喜其時明亮亦當由阿桂處面商回營自應即速相機進攻以期合力集事

甲子顏希深奏言 臣將北路卓克采以外之米儘供帶石南路木池之米協濟宜喜并撤呀嚼站安設石包為文報糧運接遞轉輸之區今全軍大舉深入達爾圖木池糧運未可專恃其北路米石應

仍由周叟運供計周叟至石包係四站至呀喲祇
二站應將石包站改安呀喲以歸省便奏入報

聞

丙寅

上諭軍機大臣曰前據文綬奏川省現調之三千兵於
二月二十七八至初一等日起程著傳諭文綬此項
川兵用之攻勦或未能得力但與富德令其同舊有
之兵看守營卡似屬力所能為若此時尚未至宜喜

或可令其就近前往南路備用即或全至宜喜亦著
明亮於此內酌撥二千速往南路聽富德遣派守卡
再甘肅兵二千五百陝西兵二千現俱赴川若於過
成都省城時酌留千餘令其馳赴南路軍營較為便
捷著諭文綬即速妥辦仍將撥往陝甘兵若干迅速
通知明亮其餘仍著明亮於新調川兵內撥往以足
三千之數

丁卯阿桂豐昇額明亮色布騰巴爾珠爾奏言現

在賊人悉其醜類於西路并日旁合力死守臣等
揆度情形於宜喜進攻必能得手一經下至瀕河
即可與西路官兵合搗賊巢實為此時最要機宜
茲臣明亮於初三日來抵西路大營會同酌議查
達爾圖一道山梁之上從前已駐官兵營卡特因
山梁南北兩頭賊人向有堅碣大卡據以死守從
山梁東面而下雖尚可以穿越林箐繞攻由得楞
山腿向東南迤邐下行壓至河沿但山溝深濶林

箐叢長必須接續多兵始能前進是以前次難於
措手今厚集兵力擬派兵數隊從山南東面穿越
箐林一面攻打得楞四碉一面即步步拏柵越溝
直上得楞山腿之上再由山腿直向東南下壓其
達爾圖山梁甲索兩邊賊人碉卡仍竭力攻打使
其中賊人不能他顧而巴舍什碉寨亦派兵前往
以防其衝突救援官兵順山腿拏柵而前一至河
岸即直抵對河勒烏圍之西南則沙壩喀爾西以

至茹寨沙爾尼等處毋須節節進攻至南路撥來
之兵已於三月初四五日內均抵附近日旁地方
而川兵頭起此時亦將抵日旁約於二十左右必
能齊集謹將臣等會商宜喜進攻之處另行繪圖
貼說進

呈臣明亮即於初六日馳回日旁上緊趕辦至臣阿
桂所請陝甘貴州兵六千茲蒙

上諭仍令各督撫等熟籌撥往并據畢沅奏西安兵二

千業已陸續起程但此三省兵丁臣阿桂原非請
增於西路西路進攻并不俟新兵如其剋日搗巢
則此三省之兵即當遵

旨飛檄停止

同日阿桂豐昇額色布騰巴爾珠爾海蘭察額森
特又奏言自勒吉爾博山梁迤邐而下至將近噶
爾丹寺又分為兩道山腿其分支處上為安吉寨
下為達佳布寨雖亦碉卡聯絡但賊因官兵一於

木思工噶克一於沿河得式梯兩處奮攻是以達
佳布賊人備禦稍疎若搶得此兩處則循向南山腿
可歷至噶爾丹寺之前循北邊山腿可歷至得式
梯之上如兵力有餘並可直取噶朗噶從此進搗
勒烏圍更無阻礙而木思工噶克及勒吉爾博並
得式梯之賊據守無益勢必不攻自潰但達佳布
安吉之下尚有碉卡數處必須一面攻打一面即
從碉卡中間穿越而過始能得手而此一帶山梁

於初二三等日大雪幾及二尺許此時山坡陰處未盡消融官兵尚難以措足若輕率進攻稍有阻滯則此處又為賊所知當必益加防守是以臣等雖心急如焚不敢輕試俟兩三日雪泥消乾一鼓直進其沿河一路所有右手礮上大礮晝夜轟摧此時亦當坍塌臣等亦于進攻達佳布之日分兵攻打以牽賊勢至遜克爾宗地勢稍低積雪已消臣等派普爾普成德哈薩爾圖分為三路進攻並

令總兵劉國樑等從右手合攻且截來援賊衆初
七日卯刻前進賊人當官兵前進之時並不即為
抗拒直至官兵將抵砌下溝邊始突放鎗石如雨
而下壕溝較舊益加深濶官兵連撲三次不能得
手因將兵丁徐撤

同日阿桂豐昇額色布騰巴爾珠爾奏言提督常
青報稱有小金川曾頭溝甲索寨頭人僧格太帶
妻子家人等共十四人已從底木達投出解送大

營查訊臣等逐一訊問伊於三十八年兩金川勾
通反叛情事頗得其詳彼時伊雖在登春而伊子
阿濟因養傷回至本寨已從賊人打仗搶佔地方
及至木果木後路已斷僧格太即隨逃入金川其
家口亦於是年冬官兵收復小金川時逃往今以
口食不繼闔家投出等語臣等復憶三十八年九
月內賡噶自賊中逃出據稱是年五月溫將軍派
令伊與楊素即甲木楚及額魯特空翎護軍巴圖

帶領鄂克什土兵十二人往曾頭溝放夾壩走至阿濟寨上阿濟正在養傷賡噶等不知其已經從逆往伊家內是夜阿濟率同三百餘賊圍住寨子將巴圖砍死賡噶與甲木楚俱受傷拏去等情當令賡噶前來認識則實係從逆之阿濟質之阿濟父子均直認不諱并穆塔稱伊父鄂伊塔爾結亦係僧格太首告被僧格桑殺死臣等詰以爾等父子是穆塔爾賡噶仇人二人現在軍營爾等豈不

知從前種種作惡均難掩飾何以敢於投出據供
如今金川即日要滅大兵進來拏住勢在必死不
如投到大營若萬一饒恕還可得命因此逃出臣
等思阿濟從賊戕害官兵核其情罪均無可宥但
現值番人絡繹投出之時若將伊等即行正法恐
適以堅其死守因將僧格太一家於附近內地屯
練地方暫為安置伊子阿濟留軍營打仗俟蕩平
金川之後再為查辦奏入

上諭軍機大臣曰阿桂等奏明亮於初三日至西路軍營會籌攻壓宜喜明亮已於初六日馳回日旁約計二十日左右各兵齊集即可統率進攻此時正當明亮等進兵之期佇盼捷音至阿桂一路擬於安吉寨達佳布兩處派兵分路攻勦所籌甚好阿桂惟當努力迅辦以副朕懷至於陝甘貴州所調之六千兵自應令其全赴西路合力助勦業已屢次傳諭今阿桂奏如其尅日檇集三省之兵即當飛檄停止等語不

應如此辦理現在大兵尚未直抵賊巢即於日內攻克勒烏圍仍須進勦噶拉依將逆首賊目全行擒捕方能蕞事且阿桂明亮各後路如遜克爾宗榮噶爾博及喀爾西甲索等處未經潰散之賊必當留兵搜洗淨盡然後可進勦噶拉依而馬爾邦一帶並須分兵夾擊引進富德共搗賊巢其哈爾薩爾路臨時亦應酌量派兵截擊是勒烏圍得勝以後需兵處尚多此六千兵正可資其用俟大功告成再令回營未晚何


必於此時遽行遣回乎又另摺奏小金川頭人僧格太帶妻子家人投出訊明父子情罪均無可宥但若即行正法恐適以堅番人死守之力等語所見非是此時官兵將抵賊巢番衆已紛紛投出與去冬情形不同無庸復為招誘即或疑畏不出亦有何碍況此等助逆賊匪敢於抗拒官兵若至我師直搗賊巢時雖出降亦不可宥又何在此時必欲其來且僧格太阿濟二犯其罪惡既已訊明不得因其自行投出稍

為寬宥著傳諭阿桂將阿濟即於軍營正法並申其
前次從逆謀害巴圖等之罪使共知儆戒至僧格太
現在安置何處即著文綬派員往彼拏至省城正法
其家屬仍分賞內地土司為奴

同日阿桂豐昇額明亮色布騰巴爾珠爾又奏言
據副都統永平等稟稱革布什咱土舍丹津札布
於二月二十九日病故臣明亮適在西路軍營公
同商酌查自金川賊酋父子跳梁惟革布什咱土

司拉旺策布登始終不附為賊酋所恨至於用計
戕殺奪其印信號紙并將土婦掠去拉旺策布登
之子諾爾布湛都爾逃出育於其舅霍爾章谷土
司處年尚幼稚是以前此令其叔丹津札布掌管
事務該處頭人百姓不忘故土司之子雖有索諾
木收伊土婦之語而復讎雪恥之心積而愈奮是
以前此收復革布什咱固皆各頭人從中內應而
日來打仗亦頗出力今正在派撥革布什咱土兵

合搃賊巢之際適丹津札布病故而諾爾布湛都爾又遠在章谷此時不可無人暫管地方查有革布什咱遠族土舍桑金邦及大頭人甲噶朋勒爾悟太均為番衆所服因給發委牌令其暫行合同辦事併飭其此後派兵打仗倍當同心出力不可稍分彼此其諾爾布湛都爾年已十三各番衆是
否願其承襲之處飭令永平李本等傳集各頭人
公同定議出結具報再行辦理奏入報



平定兩金川方畧卷一百十五

欽定四庫全書

史部
平定兩金川方畧卷一百十六至一百十八

給事中_臣查善長履勘

總校官原任侍講_臣王燕緒

欽定四庫全書

平定兩金川方略卷一百十六

三月戊辰富德奏言本月初九日准將軍阿桂行
咨令將存下兵丁仍留紕布駐守查頭二起兵丁
一千啟行已越三日仍令副都統德赫布帶往宜
喜備用餘俱撤回派赴各要隘駐守奏入

上諭軍機大臣曰前因富德續派兵三千往宜喜恐南
路存兵太單或致賊人窺伺滋擾深為屢念隨諭令

明亮於新調川兵到營後酌撥一二千速赴南路並
令文綬於陝甘調兵過成都時量撥千餘迅往絨布
軍營補足續撥三千之額今富德既將該處續派之
兵留住二千是防守已足敷用所有已到明亮處之
川兵及過成都之陝甘兵俱可無庸撥往絨布

壬申文綬奏言此次新調川省及各省官兵統計
幾及一萬糧隨軍進必須寬裕查西路軍營共存
米五萬餘石軍儲甚為充足此時雖又添兵五六

千實足供支裕如內地發運之米臣復加緊督催
以為接續之用至北路所添官兵共七千員名需
糧較廣臣查卓克采存米一萬餘石從噶克存米五
千餘石周叟存米四千餘石而南路協濟之米又
經撥吉地米二千石打箭爐倉每月撥米五千石
運交木池并令楸砥多為滾運北路每日加數發
運奏入報

聞

甲戌阿桂豐昇額色布騰巴爾珠爾海蘭察額森
特奏言勒吉爾博山脊之下尚有小山腿三條賊
人各設碉寨應分兵攻打始能得手臣等派索倫
官兵及屯土兵練分搶達佳布安吉兩處碉寨又
令瑚尼爾圖等帶兵為達佳布安吉寨官兵接續
其第三條山腿上有兩碉臣額森特率同總兵仁
和攻搶下手碉座而派副都統額爾特侍衛彰靄
攻搶上手碉座其第二條山腿上兩碉派領隊大

臣福康安佛倫泰侍衛泰斐英阿等帶兵攻搶

臣

海蘭察等緊隨接應至第一條山腿上共有四碉

令總兵保寧特成額官達色等分攻而保寧等所

攻碉座之上又有寨落兩座派烏什哈達帶兵丁

分攻又木思工噶克碉卡派副都統福珠里倭昇

額書麟等攻打牽綴

臣

等又以搶拈達佳布安吉

寨之兵若竟從康薩爾下溝行走不令為賊所見

預為準備當於十一日由密拉噶拉木之後繞

下格魯克古左邊溝內即於是日戌刻從陡崖密
箐中潛進至十二日子刻木思工噶克高處官兵
先已放鎗前進以混賊人耳目而進攻達佳布安
吉之兵已從第二第三山腿賊碉中間攀越而過
突然分路並攻無不奮勇爭先直入寨內據其一面
碉房與賊人分頭佔住奮力攻擊時臣額森特等
見安吉火彈已放即帶兵進抵第三條山腿將兩
碉同時攻得臣海蘭察福康安等亦即將第二條

山兩礮攻克賊番均被殲戮其第一條山腿寨落
亦經烏什哈達官達色等竭力奮攻將礮座克取
殺賊十數名惟是安吉寨本距噶爾丹寺甚近當
有賊數百人分為數起上來救援各官兵向前迎
殺賊人捨死鏖戰退而復進者三四次俱經官兵
擊敗其山梁上之賊又攢集一二百人憑高衝壓
官兵弓箭齊發傷斃甚多而賊因達佳布安吉寨
為其心腹之地捨死格鬪並與噶爾丹寺前來之

賊上下合衝

臣

海蘭察等星即帶兵前往接應又

有賊來衝

臣

海蘭察額森特等所得之碉福康安

等往援亦將賊人擊退日已將暮此各山腿形勢
延長道路崎嶇陡峭且均有深溝林箐間隔賊人
從中出沒滋擾官兵不及趕拏木柵石卡難以接
應遂將所得碉卡拆毀其各路官兵徐徐酌撤共
計此次殺賊二百餘名生擒六名並奪得鎗礮火
藥刀矛等物現在另行相度形勢務為破其要隘

進搃賊巢

同日阿桂豐昇額色布騰巴爾珠爾又奏言查前此富德於南路軍營及吉地章谷等處先派兵三千七百餘名調赴宜喜_臣等審度進攻兵數尚屬不敷因將所調川省咨回補缺等項官兵三千令其迅赴宜喜備用至奉

旨續撥南路官兵三千_臣等因宜喜兵數已敷是以於本月初四日咨明富德暫停調撥_臣等思宜喜一舉

此時不論何項兵丁總以一經足用立即進攻為主今南路續撥官兵三千業於初四日咨令停止倘其接准咨文即行停撥而以後川兵二千又復令赴西路則輾轉抵牾於迅速集事之局反多遲滯當即札覆明亮等以此項川兵此時應儘其遄赴北路且毋庸別為改撥以免岐悞應俟南路覆到再行酌辦今准富德覆稱續撥頭二隊官兵一千業已起程三日仍令副都統德赫布等帶赴宜

喜備用其三隊官兵甫自緘布起程隨即遵照趕
回等語是南路續撥宜喜之兵止有一千其川兵
三千自應全赴明亮處以資應用如果兵數有餘
再截留在後一千亦為便易_臣等並已咨明亮等
查照辦理至所調陝甘貴州兵六千往宜喜原為
功噶爾拉當噶爾拉等處另分一路之用當蒙

皇上以事不可行訓示周詳今復奉

諭旨令其全赴_臣等軍營聽候遣派_臣等思由功噶爾

拉等處另派一路於安設臺站等事雖非難辦但西路軍營得力之領隊侍衛章京及將領等止有此數分派另路頗費周章而相隔既遠臣阿桂亦照料不及自應遵

旨調赴此路另於附近地方探看道路合力並搗賊巢尤可速期集事均奏入

上諭軍機大臣曰阿桂等奏攻打達佳布安吉等處碉寨殲戮賊番情形此次雖殲賊二百餘生擒賊番六

名而攻得之，因難以駐守，復行拆毀，仍與未得無異。殊覺可惜。自是兵數不多，未能分路襲擊之。故今陝甘、貴州所調兵六千，據各督撫奏，均係揀派勇壯者，令其遠赴軍營，前往西路約計陸續可到。阿桂處添此生力精兵，聲勢更盛於攻勦，尤為有益。自應分路派兵進攻，必更易於得手。且攻勦之外，可派吉林、索倫兵預伏中途，截殺應援之賊。此等賊衆一出，碯外已自失其險，尤可儘力多殲，使之膽落。阿桂當努

力為之至明亮處所調南路兵四千又吉地等處兵
七百五十名計將及五千今川兵三千又俱全赴宜
喜若再於宜喜現兵內抽選數千約可滿萬自當急
籌攻取明亮現於何日進兵著即速覆奏以慰懸注
但明亮此路進兵係攻其無備果能得勝自屬甚善
但究如治病偏方難於實有把握仍當以阿桂處為
正路朕亦惟阿桂是恃不可稍有疎懈

同日阿桂豐昇額色布騰巴爾珠爾又奏言據普

爾普等報稱楊素即甲木楚已同鄂克什番人桑
結塔爾綽斯甲布番人克特爾均由賊境脫出臣
等親加訊問據稱乾隆三十八年五月內將軍溫
福派令前赴曾頭溝一帶擒捉賊人其時正值兩
金川勾通反叛將伊拏至勒烏圍嗣又送往噶拉
依頭人處問話住了一月仍發回勒烏圍伊欲乘
閒逃走被人首告脚上穿了木靴不能逃脫直至
兩月前懇求頭人當噶拉阿納木將木靴除去發

在廚房使喚至本月初十日莎羅奔等俱往噶爾丹寺念經就同桑結塔爾等挑開水溝逃出等語

臣等反覆訊問伊稱自被拏之後總在官寨中住

是以雖幾及二年而於賊境緊要情形不能深悉惟口糧短少一節與逃出諸番所供無異查楊素本係金川微末番人又因其在內地日久加以防範且性情愚蠢雖本地年多與賊人性習已殊其不能得知緊要情形似非捏飾查上年九月內兵

丁王之奉脫出供稱在勒烏圍寨內遇見楊素指
引脫出臣等錄供具奏奉

旨楊素尚可憐俟平賊後放出仍予原職今經自行脫
出其意尚屬可嘉臣遵

旨照舊給與空翎白頂但伊雖係金川之人而於山川
形勢已屬糢糊既不足嚮導之用且軍營通事亦
多留在此間亦為無益除另派人送京外謹錄供

詞進

呈奏入報

聞

四月戊寅明亮舒常奏言此次湊集多兵從宜喜
下壓最為喫緊關鍵現經阿桂悉心指示務在成
功復於十五日派令海蘭察到來將用兵道路逐
一熟籌又於十六日海蘭察密同奎林和隆武三
寶潛赴宜喜山梁細加察看而是日已撥定漢土
官兵先於日旁一帶進攻使賊人無復他疑隨派

阿爾都等在帶石前敵揚威珠爾格德等由所築
木柵過河攻奪科拉木達阿蘭保等由達巴取路
攻奪喀爾西俱於十七日子時並進詎喀爾西以
前雙礮雖經大砲轟塌半截賊人俱於礮後溝底
藏身竭力放鎗抵禦官兵幾次奮勇衝突難以向
前其科拉木達及帶石兩處亦俱不能得手臣等
因念宜喜一路指日截出沿河此一帶地方皆可
不攻自破而現在分頭進戰祇以試探賊中消息

是否移往他處拒守今既照常嚴密不值與之久
持多傷士卒遂以辰刻俱令回撤恐賊人隨後下
壓預派精銳分伏要隘果有賊番兩隊各數十餘
人從西北洛谷及喀爾西相為犄角而來我兵卒
然並起截殺十餘名餘俱竄逸適海蘭察等午後
自宜喜回營所商繞攻特朗碉卡及步步拏柵而
前以便直向西南下壓與_臣等意見俱屬相同即
擬月內通知阿桂隔河夾擊為直搗勒烏圍之局

惟是用兵既衆分路亦多在在需人督率况奎林
和隆武三寶皆深入其阻而後路綿長兩旁箐林
賊人俱可抄出攔截若逐段聯營列柵無大員統
領實不放心臣等再四相商日旁一路俱屬仄徑
懸崖必得多兵在後策應今將存營壯健抽赴宜
喜打仗則日旁即無可牽綴而各營盤早為收拾
堅固屆期酌量留兵派令舒景安都爾嘉前後分
駐互為照應可以無虞臣舒常自應同赴宜喜督

率於事更為有益茲十八日海蘭察又赴西路面
向阿桂備述籌辦緣由揀定師期海蘭察仍擬再
來約定臣即迅速進攻奏入

上諭軍機大臣曰阿桂派令海蘭察前往宜喜會同察
看進兵路徑約期會攻深合行軍機要而海蘭察往
來相度實為出力著將營中所有大緞賞給二足以
示獎勵至舒常請同赴宜喜進攻亦屬甚好其日旁
一帶據奏留舒景安都爾嘉駐彼照應其地雖係牽

綴賊勢但亦須熟悉地利之人方於事有益因思夫永平馬彪二人在宜喜駐兵已久於防範情形必能熟悉著明亮於此二人內酌派一人同舒景安都爾嘉在彼防守似更妥協仍將派出何人之處附便奏聞

同日富勒渾郝碩奏言大功將屆垂成派運軍糧尤應早為清理臣郝碩於本月十二日至梭洛柏古沿途清查米數計自前敵格魯克古至色木多

各站存米一萬八千二百餘石臣富勒渾查核後
路一帶軍糧除楸砥存米八千四百餘石係分供
西北兩路軍營不計外自孟谷至梭柏古各站存
米四萬三千五百餘石格魯瓦覺一路存米三千
餘石合之格魯克古一帶統共存米六萬四千餘
石實屬充裕核計現有兵夫以及新添陝甘貴州
三省官兵六千名可敷三月有餘之用此外尚有
省局歷次指派運交大板昭梭洛柏古兩處未完

商米並各府州二三四月份未完月米共六萬五千餘石臣等現已咨商文綬並嚴飭軍需局速將前項未完米石勒限僱運如果源源接續而來尚敷支用其四月以後月米即可緩派奏入

上嘉之

辛巳阿桂豐昇額色布騰巴爾珠爾奏言臣等於

十六日令海蘭察赴日旁會同奎林和隆武三寶等並往宜喜審度情形與明亮舒常覆加籌定核

計兵力南路各處撥兵四千七百餘名又川省新
調補缺等項官兵屆期可到二千餘名合以日旁
宜喜可抽之兵四千餘及綽斯甲布革布什咱土
兵共計有一萬數千名兵勢已極壯盛臣等復恐
官兵雖多精銳者祇有此數因於西路軍營內挑
出勁銳可仗之兵吉林索倫六百名貴州二百名
屯土兵二百名共一千名以為搶佔扼要地方及
截殺衝突賊人之用商令海蘭察及領隊大臣福

康安佛倫泰侍衛泰斐英阿等帶往以資臨時分
頭督率於二十一日令此項官兵從密拉噶拉木
之後繞至格魯克古山溝暫為歇息即於是夜越
過格魯克古山梁下山渡河使賊不能知覺現與
明亮等約定於三四日內合力衝壓必能得手至
西路沿河一路日來用砲攢轟其右手田礮上大
礮一座已漸次坍塌而木思工噶克了口原係進
搗賊巢正路只須攻開兩三處佔據即可直下

臣

等察看情形雖賊人碉卡林立其間尚可設法辦理計至宜喜一路攻壓之時沿河一帶既當合力進攻而木思工噶克山梁上其防守嚴密之各碉卡必須先為連日攻打賊人或以為此不過牽綴之兵未必實力進攻將人撤往河北則可攻之碉卡備禦稍疎即可乘虛攻克臣等並於海蘭察帶兵起身時囑以此次進宜喜衝壓直至瀕河為歲事遲速攸關倍當努力果能由彼設法渡河抄截則

已出得式梯之後賊人斷不能再守仍與西路會
兵迅進如不能渡河抄截仍即速撤回西路為併
力乘機進攻之策

同日阿桂豐昇額色布騰巴爾珠爾又奏言賊番
狡獪百出其鬼蜮伎倆實不可不慎密嚴防但道
路之遠近形勢之險易與夫賊酋賊目情形投番
等知之熟悉以為訊問嚮導之用自不可少且賊
衆所以死力拒守實因並無退步而又惑於賊酋

投出要死之語是以為其堅守若留此投番數人
在營使共知其不殺似更足以速渙賊衆之心於
大局亦為有益臣等西路於投出番人中察其人
尚可用而又帶有父母妻子者將其家口安插瓦
寺梭磨等處以資約束而令該番隨營差遣伊等
攜帶家口出來自必心生顧戀分置兩處即有中
懷叵測者亦可杜其狡譎之謀而該番在營又令
可信之土弁並飭帶土兵之將領留心察看情偽

易知似尚可無他慮至單身投出無可憑信之人
俱交附近內地安插從未令其隨營打仗此不獨
於金川番人為然即小金川番人之投出者亦一
體如此辦理查番人固稱狡詐但其中亦有未可
概論者即如本月十二日安吉等處打仗其為賊
人向所截之土弁土兵內次日即有策旺阿濟商納
三人逃出商納被賊趕上殺死策旺本係金川之
人久投內地伊被拏至噶爾丹寺賊目以其向為

大兵領路銜恨甚深痛加捶楚幾於體無完膚而阿濟係小金川頭人僧格太之子木果木失事時曾隨賊衆搶佔地方茲於本月初三日同其父母兄弟投出即請隨征自効直前打仗殺賊手腕中鎗及被賊拏去仍與策旺從礮柵內跳出此內地兵丁深知大義者不過如此而於既降復叛既叛又降之番人較之則其居心真偽實難概論况投番之實心歸順與中懷異志審其神情詞氣介在

幾微而在營通事傳言亦難盡信伊等見將軍大人意指稍偏即將投番言語略為遷就因其疑似之間無難即指為奸細是以軍營事務雖繁_臣等必將投番親為研訊務得實情今蒙

聖訓諄詳_臣等惟有益加力究嚴防斷不至墮其術中均奏入

上諭軍機大臣曰阿桂奏挑選吉林索倫等勁銳兵千名令海蘭察福康安等帶領前往宜喜以資分頭督

率是阿桂不分畛域派兵往助明亮所見極是西路兵數亦不甚多今復分減千名兵力似覺稍單又海蘭察遇有攻勦之處奮勇超羣所向克捷今令前往宜喜於彼處自屬有益但阿桂處似覺少一可恃之人至福康安近日頗有出息亦屬西路得力之人阿桂將伊等派往宜喜必見及宜喜情形為近日進兵要路故如此調派若果能從宜喜壓至瀕河自以設法渡河抄截為要明亮等久經奏及籌備渡河之事

臨時諒必應手誠能抄出得式梯之後與阿桂會兵
夾攻則勒烏圍已在掌握之中此舉實為事半功倍
佇聽捷音至另摺所奏籌辦降番之法以留數人在營
使共知其不殺似更可速渙賊衆之心固亦是一見
解但此輩賊番情性叵測即或留其在營亦不可不
嚴防密察勿為所愚而明亮處從未盤獲奸細一人
尤恐其為黠賊朦混深為屋念明亮倍宜留意慎防
毋稍疎忽貽誤至僧格太阿濟二犯罪惡昭著業經

阿桂訊明是以諭將阿濟即在軍營正法僧格太令
文綬擊至成都正法今據阿桂奏阿濟從前雖隨賊
搶佔地方茲同其父母兄弟投出即請隨征自効打
仗殺賊因手腕中鎗被賊搶去仍從礮跳下逃出等
語有此一節尚可貸其死自當暫留營中阿桂仍留
心訪察并觀其向後出力與否再行定奪其僧格太
一犯亦可且無庸辦及並其家屬且不必分賞土司
為奴統俟事竣再辦不遲將此并諭文綬知之

臣等謹案大兵由宜喜下壓瀕河夾擊直擣勒

烏圍為行師全局關鍵其山嶺形勢以及進兵

道路臣阿桂令海蘭察前往會同籌度復遣助

勁旅一千以期必濟仰蒙

皇上殷殷垂念以西路兵力分減未免稍單且少一奮

勇足恃之人致厯

睿慮臣等感深肺腑因以倍勵協恭至番人僧格太子

前經罪狀昭著

諭即正法茲以其殺賊自奮且有被執逃回之事

特命賞其一死以觀後効

大聖人如天運量絕無預設成心所以刑賞皆忠厚之

至也

癸未富德奏言

臣仰仗

天恩前准將軍阿桂所奏無庸撥兵遣赴宜喜隨將續

撥未經起程之二千兵即留於此路現俱分撥各

山梁要隘嚴防妥備賊人前來窺伺即痛加殲戮

並札商將軍明亮將尅期共舉之處預行密札以便竭力牽綴賊勢稍有可乘之隙即攻奪要隘以期迅搗賊巢奏入

上諭軍機大臣曰前因富德奏續派之兵業經阿桂停調二千則馬尼僅多派兵一千餘存之兵尚足敷用所有陝甘兵及川兵均可毋庸撥補南路隨即諭知明亮文綬等矣此旨文綬處不過二十七八日間可以接到若陝甘兵此時尚未過省自可停其撥赴馬

尼若已經撥派起程即聽其前往亦無不可現據富德奏有相機進勦之事即添此一千兵亦屬有益轉不必復行更改徒使僕僕道途致疲兵力

丙戌

上諭內閣曰色布騰巴爾珠爾前者西陲底定懋建功勲此次派往川省軍營為參贊大臣董率將弁奪隘攻碉屢彰勞績茲遽溘逝深為軫惜著加恩賞內庫銀三千兩治喪仍著伊子前往迎喪其歸櫬所經並

著沿途地方官照料護送

平
定
兩
金
川
方
略
卷
一
百
十
六

欽定四庫全書

平定兩金川方略卷一百十七

四月甲午阿桂豐昇額額森特奏言自三月二十
五至三十日大雪迷漫不分晝夜至交四月猶復
半陰半晴故木思工噶克山梁積雪未消而遙望
宜喜雪色更甚惟是山上下雪沿河則雨雪相間
泥濘尚屬易乾自當從此先行攻撲不使賊人得
以休息臣等公同籌議臣額森特率同侍衛伊里

布等直取羣尼碉寨並令翼長六十七等攻其左遊擊袁敏等循田礮而進以攻其右來珠碉寨則令侍衛彭霽總兵仁和等攻打又派副都統額爾特侍衛那木札等從碉寨中間前進以斷賊彼此往來並截殺各處來援之賊其章京納亨保等帶兵為各路接續於初五日子時同時並進官兵先已攜帶板片木梯為度溝上碉之用但寨外溝濠既闊賊又挖掘地窖藏伏其中一見官兵既從地窖孔

穴內往上擊打使我兵不能鋪板而過其礮寨上賊人又合力放鎗抵禦官兵正擬設法上攻而得式梯以及各山腿之賊合力來援經額爾特那木札等從中衝進直前迎擊殲斃二十餘人賊已從來珠寨後竄入死守且又有賊渡河前來接應官兵即施放鎗礮打中皮船賊俱墮水中餘賊亦入羣尼寨內一同堵禦官兵攻至辰刻尚未得手久戰恐多傷損因令官兵從旁撒下而急令從中施

放火礮其礮寨上放鎗之賊尚在站立抵禦多有
被礮擊斃者我兵內副參領烏爾圖委署參領六
十三俱被鎗傷查木思工噶克及宜喜山梁但得
連日快晴即能從此攻進惟是賊人狡惡異常節
據投番等稱賊人望見宜喜官兵陸續增添竭力
於噶拉依等處搜括賊衆前來守禦又因西路大
兵利害復令山塔爾薩木坦等回來合力把守是
賊人於此兩路悉心守禦實屬不遺餘力雖賊人

所備之地非即我兵攻壓之地於攻取大局毫無
妨碍但此時更須多方以悞之使其無從揣測則
慌亂自必益甚臣等已令常青旺保祿王進泰抽
出官兵於獫狁拉角克擦爾覺兩路前進相度賊人
望見之地多燃烟火作為進攻之狀其南路納木
覺爾宗一帶計有防兵三千餘並令侍衛哈青阿
於當噶爾拉等處酌量前進一同牽綴賊勢則賊
首不能不迴顧噶拉依而西北兩路併力進攻自

可剋期入再渡河船料臣等早經預備因對岸
崖礪陡削道路狹窄是以未能辦理今宜喜官兵
一經壓至河邊即當來往過渡需船更為緊要因
將預備船料越過格魯克古山梁擡至河濱成造
使賊人望見又疑官兵或將過河截日旁之後或
將順流直下相機搶殺更可亂其心目臣等逆料
賊人必來侵擾飭令官兵預為設伏防範初四日
夜亥刻果有二三十賊用船過渡前來官兵候其

上岸齊出衝擊賊人措手不及敗至河邊有上船
不及者又復落水淹斃其渡河逃去者無幾土兵
內惟有受傷二名奏入

上諭曰勉力速成功實盼望不安寢食矣

同日阿桂豐昇額又奏言德爾格忒土司魯珠布
嘉木差於上年十一月病故茲據已故土司之姝
洋湛卓爾瑪遣其頭人來營稟稱土司兒子年甫
八歲尚須等待數年方能管事土司在日一切事

務俱與洋港卓爾瑪同辦是以此時大小頭人百
姓公同商議仍願洋港卓爾瑪護理臣等向知該
土女自幼為尼並無夫家歷來協同土司辦事已
久實為衆番所服現在宜喜一路運糧所需烏拉
大半取給於德爾格忒今已故土司之子年幼不
能管事自應令該土女暫行掌管俟土司之子年
歲長成再行照例襲職臣等與明亮等彼此札商
意見相同當經給與護理執照並飭其各安住牧

遇有運糧等事照舊實心出力不得稍有遲玩奏入
報

聞

丙申文綬奏言川黔兩省官兵俱於三月內全數
出口並陝兵之第一二三四起八百餘名甘兵之
第一起一百五十名均已陸續赴營茲陝省之第
五六七八九十起官兵已於三月二十九三十四
月初一至初八等日先後到省馳赴西路軍營共

計陝兵二千已全數過省訖又甘省第二三四起官兵於四月初一初五初六等日先後到省亦全赴西路軍營其第五六起已於初八日抵成都共計甘兵已過一千四百五十名其未到之甘兵一千名亦已啣尾而來至四路軍糧目下雖屬充裕但現在新添陝甘黔兵數千名支食浩繁且時當夏令口外雨水較多輓運不易臣現飭各屬將已派之米上緊趕運無致缺少至北路驟添兵丁人

夫官役統計約添一萬餘人支食愈繁臣先已扎
令揪抵糧員加數派運北路尚恐路遠站長難期
迅速是以於南路打箭爐撥米協濟雖已有源源
發運臣恐沿途烏拉行走遲緩必須大員督催彈
壓隨飭總理道杜玉林親自出口查催以期迅速
奏入報

聞

辛丑富勒渾奏言據管理沙壩站員經歷余英稟

稱本月初六日有夾壩數人乘夜潛來搶奪戳傷
客民三名搶去零星食物又初九日夜有賊番二
十餘人在糧臺買賣街焚燒客棚搶去過客長運
商米數斛經歷同外委郭正元等督率兵丁夫役
併力抵禦有壯丁馬成龍向前追及斃賊一名餘
俱奔竄臣查沙壩一站係揪砥糧運之正路除飭防駐
薩拉副將握星泰等就近飛往查緝並令該站
員余英再批壯夫四十名合之原設壯夫六十名

協同守禦一面揀派防駐梭洛柏古都司舒時可
帶兵一百名星夜前赴沙壩嚴密搜拿復飛飭令
營卡將備於各路口嚴加堵禦以截賊人歸路再查
沙壩一帶與烏爾當叨烏達扎山等處在在相通
道路叢雜前因各要隘處所俱已安設營卡足資
捍禦是以沙壩地方祇以壯夫護守並未添派官兵
自安站以來尚屬寧謐嗣緣脫出番民及盤獲奸
細僉供賊酋口糧短少有派人偷去夾壩之語臣

復經商之提臣常青抽撥兵三十名在彼防駐今連日忽有賊番翻越重山覓食滋擾即日攻克勒烏圍賊愈形窮蹙竄軼自必更多急令設法添兵嚴密防範並痛加勦捕以絕根株查後路原設防兵烏爾當叨烏噶哩舍克達扎山等處共安兵一千餘名該處糧臺業經裁撤今昔情形不同且距沙壩一路均有數十餘里一時有事難以速赴機宜自不若酌撥附近糧臺分防以資穩固臣現咨

高提臣常青將烏爾當等處官兵酌量抽調於沙壩三松坪一帶相度情形酌定分布並咨請將軍阿桂指示遵行奏入

上諭軍機大臣曰富勒渾所奏沙壩地方賊番潛攻夾壩多不過二十餘人自係乏食窮番搶掠糊口未必由賊首遣令潛出滋擾後路但在賊番固因飢餓所迫各自為謀而在逆酋或又利其外出使糧臺夫衆稍涉驚惶致煩內地兵夫之策應亦未可定今賊番

兩次潛來俱經官兵擊退且有殲斃之人窮番自必
略知做畏不敢屢出嘗試所奏設法添兵之語殊可
不必後路糧臺安設已久各處防兵本自敷用即于
其間或有今昔異宜之事原可因時調劑酌量抽派
況前經傳諭該督等令各營夫役自行練習技藝以資
防護此次即有壯夫馬成龍擊斃賊夫之事可見臺
站夫丁業已各知自衛再於附近處所量為抽撥已
足資守禦惟當嚴飭各路員弁督率兵夫實力防禦

俾皆寧輯又何必于大功將成之際復向內地州縣紛紛添撥乎並著傳諭知之

壬寅阿桂豐昇額額森特奏言宜喜進攻一局為緊要關鍵必須木思工噶克及得武梯兩處同日攻打賊始不能撤堵西路之人以為接應宜喜之用而即就西路中又須連日攻打則賊人或以為西路進攻不過為北路牽綴一次攻搶未必復行大舉不無意存疎懈然後木思工噶克即於次日

進攻可望攻克至勒吉爾博山梁自上而下過木
思工噶克了口又有突起一峯上有木城一座大
礮三座互為犄角一得此處則其下山脊之各礮
卡固可順梁下壓而且俯瞰木思工噶克了口礮卡鎗
礮轟擊賊必不能據守臣等於十三日派令福珠里
等攻榮噶爾博下面木城書麟格勒爾德等攻木
思工噶克了口礮卡又派副都統額爾特侍衛那
木札等攻羣尼正面礮座侍衛巴三泰等從旁攻

打各於宜喜官兵未經動手之先並進攻撲賊人
放鎗滾石死力抵禦而勒吉爾博山梁及沿河一帶
之賊齊來救援並從各碉柵後竄入合同固守官
兵攻至辰刻始行酌撤是日臣阿桂即將攻打木
思工噶克了口官兵部署派烏什哈達瑚尼爾圖
等攻搶了口山峯木城碉座副將曹順等攻取山
峯右手碉座侍衛穆哈納等攻取山峯左手碉座
其副都統福珠里倭昇額書麟總兵特成額海祿

等帶兵為各路接應其總兵官達色剌國樛烏爾
納等截殺各處來援賊衆而富興保寧等攻打勒
吉爾博山梁中間塞古羅木碉寨以為牽綴並預
備木植一俟官兵得手趕斫木柵臣豐昇額額森特
亦於是日將沿河官兵部署臣額森特同侍衛那
木札等攻搶羣尼碉寨副都統額爾特侍衛彰靄
等從左合攻總兵仁和攻打來珠寨落副將西德
布等從旁攻打遊擊靈山等攻打沿河各寨均于

十四日子刻前進臣阿桂豐昇額分路督率調度
其攻打木思工噶克山峯各官兵烏什哈達等潛
密前往攀越而登賊衆放鎗外擊其三面礮內隨
即合力抵禦鎗石齊發遊擊梁朝桂等先搶東北
隅大戰礮一齊擁入其參將國興等督兵擁進木
城並用刀斧砍開數處衝入勦殺亦將木城攻獲
維時呼聲四合兵氣益揚穆哈納等將山峯左手
礮座曹順等將山峯右手礮座同時攻克所有攻

得之木城石碉內賊人被官兵殲戮者甚多並割
取首級耳記及奪獲烏鎗刀矛等物其餘官兵即
從康薩爾直至了口山峯一帶連斫木柵佔據至
攻打沿河碉寨之兵均攜帶木柴堆積於羣尼寨
放火燒焚火勢延入寨中賊人多被燒斃官兵正
欲乘勢撲進而碉後兩邊及碉後田礪之下忽見
有潛伏賊衆俱來援應且寨內火燄飛騰官兵亦
難撲進因將官兵酌撤至北路官兵先於十二日

進攻甲索槍獲大碉九座石卡一座且宜喜山梁
於十三日望見攻克得楞碉卡已至沙爾尼之上
本月復見一隊官兵向東從薩克薩谷而下已可
直至河沿與西路現攻之地隔河相對所有自日
旁沙壩以及喀爾西斯年木咱爾等處四條大山
腿四道深溝其間寨落賊人皆已不戰而逃現在
官兵所佔之沙爾尼山梁下至勒烏圍對河臨岸
其間亦無險阻日內諒即可壓下至西路本離勒

烏圍甚近只因勒吉爾博山梁既險而碉卡稠密更屬異常幾於無可著手今已將了口右手高峯碉柵佔據則攻取得式梯嚙爾丹寺以上各處皆係從山梁而下較之仰攻者究易為力而我兵既佔了口右手高峯其了口正路上雖有賊人碉卡將大礮運往轟摧不難克取一得此數處碉寨竟可直壓勒烏圍奏入

上諭內閣曰阿桂等奏分攻榮噶爾博山而木城又進

攻克木思工噶克了口碉座官兵即從康薩爾直至
丁口一帶山峯連擊木柵佔據至北路明亮之兵先於
十二日進攻甲索搶獲碉座一日而收三年未竟之
功將軍等調度有方將領弁兵亦俱實心奮勇甚屬
可嘉所有阿桂豐昇額等及在事出力之將弁兵丁
俱著交部查明議叙其尤為出力之三等待衛穆哈
納參將國興遊擊梁朝桂俱著加一級即行陞用

同日阿桂奏言伏查賊酋等死亡在即尚復竭力

負嵎苟安殘喘則於噶拉依一帶仍圖死拒亦難
謂其必無此心即此次噶爾丹寺念經據役番等
供索諾木即到該處而噶拉依已遣頭人丹巴促
令土司回去則其不能輕離巢穴似屬實情至欲
聚口糧以為堅拒數年之計則揆其力量斷不
能如此即如賊人上年曾將各處田畝盡行種植
而去秋所收用至本年正月已漸短缺况自去年
夏秋以後官兵節權要隘賊酋盡其醜類悉力拒

守即婦女亦皆令其挖濠運石所有地畝不能全
行墾種此時登高而望賊境情形歷歷如繪其可
耕之地未經翻種者甚多况南路之馬奈卡卡角
各寨西路之格魯瓦覺作固頂一帶地方均為官
兵所得而其各寨番民除殲斃投降外仍復逃歸
金川又加以小金川往來番人為數尚多人多於
昔地少於舊且又所種無多安得久資口食據投
番等供稱土司官寨內糧食亦已缺少此即官兵

攻得勒烏圍後賊酋又欲於噶拉依多造堅碉扼
塞隘口而無從裒聚口糧自難為久拒之計若西
北兩路大兵攻得勒烏圍勢必如三十七八年間
進勦金川之時一得美諾則底木達布朗郭宗俱
成瓦解賊酋等即退守噶拉依亦不過苟延旦夕
查三十六年小金川改圍鄂克什達木巴宗官寨
該土司所以能固守數月者蓋因巴爾泰先經派
令屯兵五百又運存糧五百石幫同戍守且知甲

金達巴朗拉各處皆有官兵攻打外援可恃而小金川又無大砲因得以支持日久今官兵一抵噶拉依賊人並無外援而官兵趕鑄大砲不日可成用以擊轟賊巢萬不能更為支禦但此各路滿漢官兵共計七萬有奇所糜官項實屬浩繁是以臣於受傷養病官兵一時不能速愈者隨即遣回以節糜費今官兵一抵噶拉依則各路官兵均可同時會合除分兵四合將各處大小碉寨盡數掃除外

其所存噶拉依一隅即有一兩月稽延誠如

聖諭亦無須多兵圍守臣屆時一面圍攻一面即將可

撤之兵先行陸續撤回不但可以節省軍需而於
勝兵凱旋之時亦不至擁擠奏入

上是之

癸卯明亮海蘭察舒常奏言自初九日天氣放晴
臣等公同商酌派教成帶漢土兵二千五百名於
十二日先攻甲索以分賊勢而於十三日從宜喜

分頭並進當即飛札通知阿桂富德同時攻打務
在成功但查甲索一帶賊碉祇有老弱防守教成
督兵前去恐木克什巴舍什賊人就近救援臣等
先於十二日子刻從此兩路分兵牽綴及至旭日
始升遙望教成一路連破賊碉數座一面即派參
領噶塔布帶兵七百名馳往接應旋據教成稟稱
五更時將到山頂督同副將常泰參將瑚圖禮哈
芬布遊擊銜馬應詔都司彭成堯等分作三路直

逼碉根一擁向前當將要隘三碉立刻攻破乘賊
慌亂之餘並又搶佔左右兩山賊碉七座已刻以
後將接連俄坡之東山賊碉四座亦經佔據統計
前後奪取戰碉一十四座等語是甲索既經得手
則宜喜一路更覺勇氣倍增臣等查達爾圖以下
得楞一帶山岡綿延二十餘里其上碉卡添築甚
多並須分路進攻使賊人彼此不能相救隨派科
瑪進財寶分攻得楞大碉以及上手相繼石城其

間東南斜插山腿所列二碉派令阿爾都衆神保
分攻由得楞而南峯巒疊起之上碉卡相接派令
三寶和隆武奎林珠爾格德等分隊取路上攻烏
爾圖納遜帶兵在後接續其向東山腿側下臨河
之處尚有賊碉聯絡其間派令福康安佛倫泰斐
英阿帶兵攻取至十三日子利陸續進發
臣海蘭察帶兵策應得楞各隊臣明亮舒常於達
爾圖木克什等處分頭督率未及黎明各官兵奮

往爭先而環山上下賊人鎗礮齊發直至辰刻賊衆四面蟻聚為數至多而臣等此次接應兵至萬餘實向所未有其氣愈壯旋見三寶和隆武等官兵各將所築之碉先後攻克併奪獲附近石卡數座而福康安等搶奪石卡二座之後即乘勢壓下復搶奪石卡一座其時各處賊人勢難再支紛紛奔潰被我兵刀矛鎗箭所斃約有二百餘人割取首級耳記共三十件生擒賊番七名現在官兵各

將所得地方嚴為守禦及從溝內前去之路當即
共挈木城九座以便運送火藥口糧無虞劫掠惟
達爾圖前敵以至得楞實因濠深地險賊人捨死
擁衛俱難克取然得楞以下各碉卡全被我兵搶
佔賊人已截在後臣等乘賊人立脚未定無險可
恃之勢一面將未後兩起新調之兵於十三日已
到橋頭催集上山尅日直下河沿非惟達爾圖等
處賊人立見竄散即沙壩山喀爾西等處皆已攔

截在內自可不攻而得奏入

上諭內閣曰明亮等奏攻克甲索宜喜並統衆下壓各情形將軍叅贊等調度有方將領弁兵俱能奮勉出力甚屬可嘉著交部查明議叙總兵教成統兵攻克甲索尤屬勇往超羣著賞給僧格巴圖魯號以示鼓勵

上諭軍機大臣曰明亮北路情形與阿桂西路不同西路雖遜克爾宗等寨未經攻得然其地尚隔一峯即

得式梯羣尼等寨亦在河沿並居了口之下今阿桂
從了口山梁下壓賊人自無由在後抄襲至北路之
達爾圖喀爾西等處現為官兵截住其賊諒可不攻
而潰但各處賊衆尚多設或乘我兵下壓之時後路
潛出滋擾不可不慮此等機宜明亮自能見及但恐
伊等銳於進取防範或不免稍疎所關匪細著傳諭
明亮等將達爾圖等處後路留心防護勿使賊人得
以窺我之隙稍滋事端

甲辰富勒渾奏言查沙壩一帶屢有賊番滋擾該處為揪砥糧運正路不容稍有疎虞今兩軍合集進攻將來糧石均應由此供運道路尤宜肅清雖經臣於梭洛栢古喀爾西大板昭抽撥官兵一百名暫赴該處駐札搜拏但為數無多不敷防範而大板昭一帶俱係糧運緊要地方處處環抱賊境前撥之兵亦不能久留沙壩臣節次咨商提臣常青將瑪爾當一帶官兵酌量抽調於沙壩三松坪

等處安設分防尚未覆到今暫調撒拉防兵一百名瑪爾當防兵五十名先赴沙壩合之臣前撥之兵一百名交都司舒時可分安卡隘在彼嚴密搜拏用資捍禦奏入

上諭軍機大臣曰大板昭一帶為糧運正站且係軍營緊要後路防守尤宜嚴密現在富勒渾等酌將後路官兵抽撥分布安設自應如此辦理仍著富勒渾旺保祿王進泰常青等督飭各卡隘一體嚴密防禦勿

稍疎懈

巳已明亮海蘭察舒常奏言達爾圖以下即為得楞得楞以下即為基木斯丹當噶其山腿斜向東南由北直下已隔河越過噶爾丹寺之前其基木斯丹當噶向東另分山腿地名薩克薩谷與額森特帶兵下壓之處緊接如將薩克薩谷先行攻克則日旁右手之沙壩山喀爾西色格落瑪色布里並上連達爾圖得楞等處日旁溝口之斯年木咱

爾並溝內斯聶斯布羅等處地方統計周圍五十餘里其間寨落計數百處番戶極為稠密皆可攔截在內隨於十四日臣海蘭察及奎林和隆武福康安三寶佛倫泰科瑪泰斐英阿阿爾都富寧烏爾圖納遜阿蘭保率同侍衛章京及綠營將弁分作數路從薩克薩谷同時並進各賊卡望見我兵搶近卡外即用排鎗迎擊驟如飛電我兵躍入卡內直向前攻至未刻即將薩克薩谷山梁全行攻

獲隨即挑派健銳分路要口埋伏賊人愆不畏死
竟夜半四次聚集番衆上山搶奪新立營盤俱為
我兵擊退至十五日丑刻達爾圖得楞沙壩山各
處賊人紛紛棄礮從沿河山脚潛竄我兵隨後追
殺其墮崖落水及為鎗箭所斃者不計其數至是
日辰刻阿桂已將預備船隻運至河干往來渡載
當經福康安佛倫泰等帶兵將斯年木咱爾及斯
聶斯布羅兩處寨落於巳刻以前悉皆攻克所有

自東至西環山五十餘里之內大小數十餘里寨
落派兵搜檢並無存留糧米止有牛羊零星什物
俵散出力兵丁一面放火燒燬臣等現已飛調日
旁留守舊兵以便并力前進奏入

上諭軍機大臣曰此次攻勦得勝明亮調度有方海蘭
察福康安尤為出力均屬可嘉明亮福康安俱著授
為內大臣海蘭察前此已授內大臣著賞御用荷包
以示鼓勵俟大功成時自有殊恩懋賞現據明亮等

搜查該處五十里內所有數百里寨落並無糧石存貯賊衆之乏食可知今兩路大兵會合自即乘勝深入掃穴擒渠佇聽捷音

同日劉秉恬奏言查西路糧運現至大板昭至軍營共有存米五萬餘石目下無須加運至北路軍營每日需米三百餘石該處存糧本不似西路之充裕必得寬為預備遂飭揪底糧員以西路之餘糧協濟北路除每日長運商米一百數十石外總

由楸砥發米三百數十石及四百餘石不等自三月初一日至四月十五日共發過米一萬五千二百餘石頃據松茂道查禮稟稱現到北路軍營查得卓克采存米一萬三千二百餘石周叟存米三千三百餘石覺木交存米一千一百餘石軍營存米一千石合之在途未到之米約有米二萬餘石是現在北路糧運亦有不虞缺乏其新派成眉卍等屬人夫二千餘名臣留心查考現過桃關者共

有一千七百餘名已陸續經過楸砭赴營該處移營前進以現有之夫添設新站即可以續到之夫撥補舊額諒亦不致遲悞茲臣於十七日見將軍明亮等十四日所發之摺傳牌內填寫自基本斯丹當噶拜發是必我兵下壓業已得手查從前西北兩路軍營雖乘船過渡亦時可以往來相通因日旁宜喜沿河賊人尚未廓清是以糧運須由兩路分運今我兵業已下壓得勝如此一帶已無賊人拒守

則一切糧餉軍火等項自應由西路之格爾克古
等處渡河遞運北路方為直捷省便似不必仍遠
北路從噶克等處轉致迂折多費臣除行知總理
道員確查情形妥辦並扎商督臣富勒渾撫臣鄂
寶公同酌定奏入報

聞

平定兩金川方畧卷一百十七

欽定四庫全書

平定兩金川方略卷一百十八

五月己酉阿桂豐昇額海蘭察額森特奏言查木
思工噶克本屬進取勒烏圍正路為賊人緊要門
戶賊人見官兵佔住最高峯頂因於十四日攢集
醜類悉力合衝經穆哈納曹順國興等督率各兵
分頭迎殺計此一日之內賊人散而復聚退而復
進者七次均被官兵擊勦殲斃始行遁匿先是臣

阿桂一得山峯碉柵時即思賊必盡勒吉爾博山
梁及得式梯沿河上下之人悉來抵禦且沿河碉
寨亦於十四日早間攻打焚燒賊度官兵未必再
來若即於是夜攻搶擦庸等寨可期捷獲當於亥
刻仍派令十四日領兵各員分隊進攻至十五日
寅刻將擦庸碉寨數十間並附近大碉寨柵石卡
悉行攻獲官兵乘勝進撲來珠碉寨賊人先經知
覺預備連撲三次不能得手至十六日丑刻暫將

官兵撤下至木思工噶克了口木城石碉臣等先
於十五即將大礮運往轟摧十六日又將趕鑄大
礮一位運往從上下擊至十九日丑刻乘濃霧四
塞之時派兵前進午刻霧氣將散各兵踴躍直前
當將大礮石卡木城悉行克獲共殺賊五十餘名
又將了口拏柵佔據至了口以下即係木思工噶
克寨官兵直前搶入放火燒之又相度賊人來援
之路於箐林內潛為設伏殲殪者亦多查十四日

所克之了口右手山峰詢之番人地名上巴木通
其下又有碉兩座名下巴木通此時官兵既得上
巴木通又將了口正路碉柵盡行攻克則賊人之
門戶已開但下巴木通碉卡相逼甚近前進之路
尚為窄隘當此賊人心寒胆喪之時必應厚集兵
力為一舉搗巢之局臣等相度沿河一帶情形節
節攻取仍多費手若將下巴木通兩碉攻得即可
從木思工噶克了口分頭並下其噶爾丹寺得武

梯等處又可邀截在內目下若無大雨雪即擬發
兵攻搶開寬進兵之路直搗賊巢

同日明亮海蘭察舒常奏言查基木斯丹當噶山
腿向東南迤邐而下直至臨河賊人連築石十五
座聚衆固守若能攻克不惟茹寨以前各寨落俱
可攔截在後即木克什以至沙爾尼其間寨落密
布皆與基木斯丹當噶相連寔為扼要臣等於十
六日辰刻帶領官兵一擁向前將各卡立時搶奪

在茹寨以前各寨俱經焚燬惟茹寨以及沿河之賊尚在固守官兵若佔至河沿諒彼處可不攻自潰且目下進兵道路漸見平坦非得楞一帶險仄可比臣等於日內務期壓至瀕河以便迅搗勒烏圍成破竹之勢現在日旁已通將兵二千餘名調赴薩克薩谷分駐山梁益壯聲勢均奏入

上諭軍機大臣曰阿桂奏攻克木思工噶克了口木城石礪現籌合力進勦同日明亮奏由基木斯丹當噶

統兵下壓奪卡前進情形兩路在事將領弁兵俱各
奮勇出力甚屬可嘉著行存記俟攻克勒烏圍一併
交部優叙

同日富勒渾常青奏言查沙壩現在安設糧臺小
沙壩係在沙壩撒拉適中之地均關緊要且該處
道路叢雜箐密溝深賊人萬分窮蹙之時計圖覓
食或冒險捨死而來至三松坪為沙壩上站糧臺
相隔不遠均應酌添兵力以保無虞

臣

抽兵二百

四十名於小沙壩安兵一百名沙壩安兵一百名
三松坪安兵一百名仍揀派都司一員督率駐守
唯三松坪一站兵數稍單茲據臬司李世傑撥解
民壯一百名到來現復分兵六十名即赴三松坪
合之官兵四十名協同守衛_臣等仍督率將隘官
兵實力巡防嚴行堵截奏入

上嘉之

壬子明亮舒常奏言竊本月十六日由基木斯丹

當嚙下壓東南立將賊卡搶奪旋因連日大雪迷漫暫為停止發兵賊人乘此空隙即於我兵所下陡坡在前敵趕築大戰碉二座石卡四座以為退一步守一步之計至二十日天氣放晴若不及時進取恐賊人深挖濠溝修築堅固攻之未免費力隨派奎林等分作數路同時並往于二十一日進發賊番在卡內鎗發如雨官兵由陡坡一擁而上或刨挖碉根拋放火彈或跳入卡內奮勇誅殺賊

人勢難再支其在碉卡內者盡行殲戮在外之賊當即穿林入箐四散奔逃碉卡全行克獲計此次殺賊二百餘名割獻首級十顆耳記二十餘件前阿桂所奏自日旁沙壩山以及哈爾西斯年木咱爾所克四條山腿四道深溝之外自茹寨至基木斯丹當噶共有五道山腿溝內寨落五十餘處焚燒一空現去臨平壩即在咫尺之間至教成現已在甲索帶兵下壓將俄坡木克什一帶碉卡悉已

佔據自河北一帶賊境而論已為大兵奪取過半
現在海蘭察等帶兵一千仍赴西路協勦此數月
來賊人窘迫情形已為畢露由此迅搗勒烏圍諒
非難事奏入

上諭軍機大臣曰明亮等奏攻克基木斯丹當噶山腿
賊碉所辦甚好奎林等攻碉出力均屬可嘉統俟攻
得勒烏圍一併交部優叙現在阿桂等統兵自木思
工噶克下壓計日可得噶爾丹寺明亮進至臨河時

自必於勒烏圍對面搭橋過河兩路會合夾攻勒烏圍自可以尅期攻克佇聽捷音

癸丑劉秉恬奏言前此黔省官兵因軍營催調緊急每日趕行三四站或四五站自桃關至大板昭僅止行走七日茲查陝甘二省兵丁雖不能及黔兵之步履便捷然亦各知奮勇爭先計自桃關至大板昭亦止行走七日實屬一律迅速再查連日以來口外雨水頗多其楸砥至桃關一帶道路業

經隨時修理至由楸砥至日爾拉薩拉一帶更關
緊要臣於拜發奏摺後親往各該處逐加查勘或
有雨淋塌卸之處臣趕緊修整務期糧運利而文
報速並順道前往大板昭軍營等處確查近日實
存米數即與督臣富勒渾悉心籌酌情形壯路軍
食歸併西路遞運以省糜費奏入

上嘉之

同日

上諭內閣曰黔省兵丁節次調赴川省征勦金川最為得力屢經酌加獎賞今大功計日可成伊等家屬在黔雖有月糧足資養贍朕今軫其勞績宜昭逾格優施著加恩將貴州調赴兵丁家屬各賞給半月錢糧以嘉勤事而示體恤該部遵諭速行

甲寅阿桂豐昇額海蘭察額森特奏言伏查西路官兵先將上巴木通攻得隨又搶據木思工噶克了口正路惟下巴木通一處賊人設有雙碉醜類

蟻聚此時惟在克下巴木通分頭並進即可勢成
破竹連日天氣快晴因於二十一日亥刻分兵進
取二十二日寅刻前進下巴木通地勢既極陡峻
上下雙礮中間賊又攔截木城一道濠溝洞穴縱
橫重疊放鎗擲石死力抵拒臣海蘭察額森特督
催官兵於鎗石如雨之中將攔截木城扳開從中
衝出又由兩大礮旁繞出礮後圍截而正面官兵
隨各一擁直上臣海蘭察所督官兵先將下手一

碉攻克臣額森特所攻一碉亦即攻克碉內賊人
皆被殲戮得脫者亦少查此兩碉以下雖碉卡林
立直至噶爾丹寺之上並無空隙而勢已佔據上
游臣海蘭察額森特遂乘勢督率順梁攻壓我兵
踴躍爭先又將色爾外安吉達佳布一帶各碉寨
悉行攻獲直至噶爾丹寺之前所有碉卡寨落百
餘處之賊無有敢復抗拒者維時五岱等兵先至
來珠寨下直前撲進攻克得式梯賊人旋棄碉寨

而迺即將上下得式梯全行佔據至烏什哈達海
祿劉國良等攻了口左手木城石碉書麟保寧特
成額等攻山梁上木城石碉至申刻亦均先後克
獲此勒吉爾博一道山梁上下迤延幾二十里所
有碉寨儘數埽除及至戌刻烏什哈達等率兵直
上榮噶爾博大山梁將各碉搶得直至第三峯之
上臣阿桂豐昇額迅派官兵前往接應連夜分擊
木柵石卡將各緊要地方嚴密佔據是夜臣等悉

行商酌當此賊膽已破之時不可稍使停留生智

至二十三日卯刻

臣

海蘭察額森特復帶兵前進

直抵噶爾丹寺賊在寺內攢集多人抵拒

臣

等思

噶朗噶寨雖在噶爾丹寺以內若從安吉而下將

噶朗噶一帶地方數十處掃淨則噶爾丹寺已被

截在內可以不攻自潰遂分數隊官兵前往攻打

但時已未申難以佔據因將官兵酌撤

臣

等復思

榮噶爾博與勒吉爾博本屬一道大山梁分為兩

支其自榮噶爾博迤西而下為勒烏圍自勒吉爾
博迤下而西北為噶爾丹寺及得式梯官兵若得
噶爾丹寺及噶朗噶前抵勒烏圍固為直捷但中
間沿河多係危崖一線之路尚恐不無阻滯今官
兵於榮噶爾博大山梁已佔至第三峯而木思工
噶克又先已攻得若一路官兵由大山梁前進又
分一路官兵出木思工噶克了口由半山前進佔
至第九峯則俯臨勒烏圍執若建瓴而噶爾丹寺

噶朗噶自歸掌握因於二十四日寅刻仍派福康

安等分為上中下三路均于山半進攻

臣

海蘭察

額森特緊隨策應又派烏什哈達等即從第三峯

前進轉戰而前直抵第七峯之上奪獲碉卡甚多

此數日接連打仗共計克大碉一百數十處木城

數十座寨落二百餘處寨房一千數百間殺賊三

四百名生擒十名奪獲牛羊鳥鎗刀矛等物甚多

查此時官兵直臨巢穴賊人恣力為困獸猶鬪之

計臣等擬從現在攻得之第三條山腿發兵連拏木柵直至河邊并從第三條山腿赴溝拏柵逕逼賊人所據峯下小山腿之各碉寨用礮轟推彼時即不得其第八九峯竟從半山繞至托古魯地方則已據勒烏圍之上自可即日掃巢奏入

上諭內閣曰阿桂等奏攻克下巴木通碉寨將勒吉爾博山梁碉卡掃淨及乘勝佔奪得武梯官寨等語阿桂等督率將士奮勇進攻所至克捷甚屬可嘉至所

有將軍叅贊及領隊大臣等俟攻得勒烏圍時一併
交部優敘其在事出力之將領弁兵等即著阿桂查
明分別等第咨部議敘

同日富勒渾郝碩奏言臣等于四月十一二十二

等日先後前往軍營查我兵已攻獲木思工噶克
勒吉爾博得式梯等處均須拏豎木城挖掘深溝
正在急需兵力若仍令其樵汲炊爨不免兵力稍
分隨飭知督運糧員于附近買賣各舖家買辦燒

餅一萬餘個送赴前敵並將脩貯裹帶灰麵酌撥
一萬餘斤分發各鋪戶令其趕做麵餅運交頭敵
如遇官兵打仗之時即將此分給各兵以資食用
亦可省兵丁另自炊爨俾兵行益加迅速再查日
旁宜喜一帶各山梁全行攻得所有作固頂山梁
官兵業經撤赴前敵而徐營糧站距新得各山梁
地方道路遼遠運送軍米往返維艱已將格魯克
古一站移設前敵適中之地以便分運目下我兵

乘勝長驅一經攻獲勒烏圍即須安設兩三站臣
等業已籌畫於附近軍營各站預先僱備人夫三千
名並採辦臺馬數十匹以備添安新站至宜喜一
路官兵既經至河岸不日兩軍既可會合其糧運
臺站自應就近併路運供以歸省便臣等現已商
之將軍阿桂札知撫臣鄂寶速赴西路軍營公同
商議妥為籌辦奏入

上嘉之

丙辰文綬奏言據北路總理松茂道查禮稟稱大
兵連日攻克基木斯丹當噶及日旁一帶山坡碉
寨百餘座盡日奪獲現在移營前進其新得處所
均應安設臺站人夫需用較多查成都眉邛三府
州派安北路之夫將次抵站現在調赴宜喜添用
應飭軍需局再調糧夫先補解梭磨周叟添安各
站等語臣隨飭軍需局照鄂寶所調再派夫二千
餘名飛解北路以補梭磨周叟之用茲於二十九

日接富勒渾扎稱西路迅搗賊巢人夫恐有不敷
應飭局撥備二三千名聽候調用臣又飛飭軍需
局如數撥派一俟軍營調取即可迅速起程查西
北兩軍均逼賊巢會合之後北路兵食即可取資
西路則北路站夫即可減撤不致虛糜至軍米一
項現在添兵數千即日兩軍合營積存之米每日
支食漸及有減無增臣現將五六等月糧照常運
供不致稍有怠忽奏入

上嘉之

同日鄂寶顏希深奏言查大兵前此分路進剿軍糧分道運供原因道里分歧間有隔於賊境不得不紆迴取濟即如壯路自楸砥分運至宜喜遠至三十九站加以新安之得楞基木斯丹當噶二站共計三十一站不惟路遠站長且中隔諸山皆極險峻冰雪終年不消今壯路攻克達爾圖以下之得楞直至基木斯丹當噶其下沿河賊境奪獲甚

廣現由色仰木扎拉搭造浮橋渡河以通西路之博楞古站若將北路運糧改由西路之北楞古止須添設六站即可直抵基木斯丹當噶新營其博楞古以內即可由西路現有之臺站歸併輓運且自達思滿起至得楞三十站均可裁撤按每站夫六百名今新添六站共止用夫三千六百名實可餘剩二十四站之夫其自孟固至博楞古共一十八站既兩路合運軍糧軍火較多原設夫數恐不

敷用應請每站再加夫五百名共加夫九千名連
前添設新站之夫共一萬二千六百名實可節省
夫五千四百名臣等現已一面飛飭楸砭站員將
北路軍糧軍火概行停運一面飭將達思滿至馬
鳴橋一十二站內軍糧等項儘數趕運卓克采即
先行裁撤至原派各屬辦運北路卓克采等站之
月米即行趕運梭洛栢古交收與原派程站既近
腳價亦屬較省奏入報

關

丁巳明亮舒常奏言查斯年未咱爾溝外轉過山
嘴即係茹寨一片麥田賊人現因收穫在即抵死
衛護以茹寨戰碉拒其險要薩克薩谷一路官兵
難以逕進其沿河數百處寨落星羅碁布若必逐
一攻燒不惟多費兵力且恐多傷士卒惟當於基
木斯丹當噶山腿盡處竭力衝開賊壘一路拏卡
向前直抵河沿則茹寨一帶地方皆可攔截不攻

自破隨於二十三日派令奎林等帶領官兵分為左右兩翼迤邐而下抵住賊人救援來路一面派侍衛進財保等帶領勇健官兵同土兵搶佔臨河緊要碉寨賊人見官兵勇往隨各棄碉寨逃竄其時副將圖欽保帶兵薩克薩谷即攻克茹寨戰碉將各寨落縱火焚燒沿河各寨內竄出賊人前後受圍中箭被鎗亦有墜河而死者自山腿以下麥田十餘里皆為我兵佔據由此至勒烏圍隔河對

面至甲索山腿直插河流橫隔去路其山頂數峯
其碉卡三十餘座均經戩成逐漸攻克現以各處
兵數僅止三千餘名防範尚屬不敷臣等又在大營抽
撥四百餘名前往協守且查甲索山腿層巒疊起
極為綿亘下壓甚易而山腿西面其上為曲碩木
再下為納木迪又下為阿爾尼克爾瑪思當阿皆
有寨落數十處環繞其間而基木斯丹當噶下截
山岡與之相並賊番現當窮蹙尚思計圖滋擾每

夜攢集二三百人潛來偷劫我兵防備甚嚴隨手擊斃多賊臣等現在趕緊設法前驅即夜逆酋率衆死拒亦斷不能多延時日奏入

上諭內閣曰明亮等奏茹寨以前一帶平壩寨落全行攻克麥田十餘里皆為我兵佔據明亮等董率勁旅所向克捷甚屬可嘉總兵敖成攻勦甲索等處副將圖欽保攻勦茹寨尤為奮勇出力敖成已賞給巴圖魯號著俟攻得勒烏圍時同將軍叅贊領隊大臣等

一併交部優叙圖欽保等交將軍等記名遇有軍營
總兵缺出即行奏請補授其在事出力之將領弁兵
等著明亮查明分別等第咨部優叙

同日

上諭內閣曰前以金川賊番黨助逆豎抗拒王師均屬
罪大惡極曾屢諭將軍叅贊若我軍乘勝深入賊番
窮威難支出而亡命雖投降亦不可輕宥今阿桂明
亮兩路官軍計日可以合力會勦迅掃勒烏圍直搗

嗜拉依鼠黨孤羣自必立就駢戮但為數不免稍多
朕仰體

上天好生之心有所不忍且此輩番人勢窮食乏尚為其
酋捨命死守亦頗足取是以網開一面施法外之仁
著將軍於進兵時預行宣諭賊衆如有畏罪出降者
仍從寬免死倘或怙終不悛於掃蕩賊巢時玉石俱
焚難以復追並將此通諭知之

臣等謹按番衆黨惡助逆抗我願行罪不容誅

至

王師直壓賊巢聚殲醜類實孽由自作迺蒙

皇上曲加矜憫未忍駢誅

特令網開一面宥免來降如仍怙終不悛始從玉石俱
焚之例

聖主覆幬深仁與彰瘴大義並用兼施而蠢茲頑梗始
為螳臂之逞者究無不為鷄音之革也

戊午

上諭軍機大臣曰現在阿桂明亮兩路屢次克捷計日合兵進勦自可迅掃烏圍即乘勝攻圍噶拉依諒逆酋等不能久為支拒但賊番狡詐百出恐其勢當窮窘別施鬼域伎倆或假裝逆酋兄弟詣軍門捏稱投降暗藏巨測將軍等倘不察虛實輕率出營相見設或誤墮術中所關非細此時務期掃穴擒渠所有逆酋兄弟及濟惡之頭人雖降亦斷不可恕但彼既稱來降即可誘而擒之以歲斯役惟當慎之又慎勿

稍涉大意所謂受降如受敵也

同日富勒渾奏言查西路糧運向由凱歌坪直運

密拉噶拉木作為半站大兵現已攻獲木思工噶

克勒吉爾博得式梯等處其格魯克古一站臣已

奏明裁撤移於木思工噶克山梁了口安設其分運北

路餉道臣等詳加籌酌核具道里遠近應由密拉

噶拉木分路至得式梯作為一站由得式梯直至

色仰木扎拉作為站半即可渡河由勒森寨等處

轉運基木斯丹當噶較為捷便所有北路達思滿
以外各站均可次第裁撤原派卓克采月米亦即
改運梭洛柏古等處交收目下卓克采之米既由
色木多轉輸應即另委妥員駐彼接收滾運其西
路之米仍由梭洛柏古直運薩爾亦不致牽滯再
卓克采存米一萬二千七百餘石不過一兩日內
即可運完仍將色木多一帶糧臺裁撤以歸節省

奏入

上嘉之

已未

上諭軍機大臣曰阿桂明亮兩路屢次得勝掃蕩勒烏圍自非難事既得勒烏圍即須進攻噶拉依第恐逆酋負隅死守得之未能迅速自當分兵至馬爾邦引進富德夾攻賊衆必更難于兼顧所有此路之兵自應大員帶往若須副將軍親帶即仍令明亮舒常統兵而行或派叅贊大臣則莫若派額森特阿桂當遵

旨妥酌而行

辛酉阿桂豐昇額海蘭察額森特奏言查自榮噶爾博第八九峯順腿而下即係勒烏圍官兵一克此處賊巢斷難再守而此兩高峯地形陡峻且與兩小山腿聯絡應援是以賊人於此悉力聚守若將噶爾丹寺及噶朗噶乘勢掃除既可將勒吉爾博山梁上下分駐之兵多為抽撤以供攻勦而分兵一支沿河前進雖該處道途亦屬險仄亦可稍

分賊勢第噶朗噶寨落雖被官兵燒搶十之六七而賊入於所剩各寨仍復竄伏竭力抵拒官兵若於第三條山腿連拏木柵而下一至河邊不獨噶朗噶攔截在內即噶爾丹寺亦不攻自破但第三條山腿兩旁皆有寨落必須分兵防護臣等督令官兵於二十七八兩日在各山溝內砍伐木植運往第三條山腿之上至二十九日一面督兵接拏木柵一面分撥官兵以備截殺來擾賊人並燒搶

餘剩寨落惟是賊人情急分隊來援上下衝突官兵直前迎殺殲斃甚多始行竄逸而我官兵連擊木柵十七座已至山腿中間併將前此未及焚燒之碉寨攻搶焚燒十餘座是日並派五營帶兵由噶爾丹寺上面分路下攻噶朗噶各寨官兵所至騰躍而登旋克寨落二處進至噶爾丹寺南邊溝內各寨賊人仍復悉力拒守因將官兵暫撤至初二日復由山腿中間接擊木柵九座至沿河平壩

將賊圍截在內痛加殲戮此一兩日內即可掃淨
噶爾丹寺噶朗噶或合或合力奮攻第八九峯或
從噶朗噶沿河直進在在可以相機攻勦至遜克
爾宗一處官兵雖已環其三面但賊仍前死守臣
等攻克榮噶爾博山峯之時即令富興成德六十
六等於遜克爾宗西北設立木柵連接榮噶爾博
向東山腿以為聯絡進逼之計臣豐昇額亦即日
前往親為督率奏入

上諭軍機大臣曰阿桂等奏官兵接拏木柵直趨河沿
截斷嚙朗嚙爾丹寺以期迅搗賊巢所辦甚好官
兵屢次克捷勇氣倍增攻勦自非難事惟是賊入勢
處窮戚正如困獸之鬪以攫噬自衛其死此時功速
垂成諸宜謹慎遇有賊寨鎗石密施之處均勿冒險
輕進然亦不可過於持重致涉因循

臣等謹按由榮嚙爾博第八九峯順下即逼勒烏
圍賊巢臣阿桂等督率官兵接拏木柵直趨河

金少臣八ノ言 卷一百十八

沿進逼賊巢官兵等奮勇直前勢如席捲我

皇上臨事而戒慎謀以成猶令將佐等勿狃易成之功

以防困獸之鬪又慮過於持重或致未合機宜

斯誠

睿慮周詳無遠弗届者矣

平定兩金川方略卷一百十八